

雲南通志卷之第二

星野 氣候附

星野之占九州皆有定位惟滇附於益以合雍
觜參井鬼之辨諸家因互為抵牾然滇屬井鬼
一行之論既與班氏相符卽以象變事應攷之
亦往往有合者蘓伯衡曰分野指列宿所屬之
星土因次舍所見妖祥占其屬地應若桴鼓往
歲熒惑入井鬼而曾逆亂作熒惑守輿鬼薄積
屍氣而吳逆敗亡言天者驗於人則滇屬井鬼

雲南通志

卷之二 星野

一

無疑矣至滇處西南於後天卦位為坤得土中
氣故氣候頗異他省並附記之庶敬授者知折
衷焉作星野志

井鬼 躔度攷

東井八星輿鬼四星南方朱鳥七宿之首與日
也按古曆法井宿赤道三十三度三十一分黃
道三十一度三分鬼宿赤道二度二十分黃道
二度二十一分

本朝曆度井宿三十一度鬼宿五度皆屬未宮漢

天文志起井十六度唐志起井十二度晉志與費直皆同唐志蔡邕起井十度明起井九度一十八分四十一秒

本朝起井初度蓋以赤道分天之中亘古不易黃道爲日月五星之常道不能不因歲差而變易也論分野者惟以赤道爲準井鬼之星於分爲秦於野爲雍梁二州爲巨蠲宮爲鶉首未宮井宿則雨水昏中鬼宿則春分昏中

北極出度攷

雲南通志

卷之二 星野

二

雲南北極出地二十二度四時之日皆出卯入酉其間微分初刻正刻耳與京師出寅入戌出辰入申之不同者以京師北極出地四十度強故也

雲南表景度分

春分四度五十一分

夏至十九分

秋分與春分同

冬至十二度十三分

井宿昏旦攷

六月 旦在 卯

八月 旦在 巳

十月 旦在 未

十二月 旦在 酉

十二月 昏在 辰

二月 昏在 午

四月 昏在 申

鬼同

七月 旦在 辰

九月 旦在 午

十一月 旦在 申

十二月 昏在 卯

正月 昏在 巳

三月 昏在 未

五月 昏在 酉


雲南通志

卷之二

星野

三

雲南分野井鬼圖





雲南通志

卷之二 星野

四

井宿步天歌

井 八星近列河中靜一星名鉞井邊安兩河
 各三南北正天罇三星井上頭罇上橫列五諸
 侯侯上北河西積水欲覓積薪東畔是鉞下四
 星名水府水府東邊四星序四瀆橫列南河裡
 南河下頭是軍市軍市團圓十三星中有一箇
 野雞精孫子丈人市下列各立兩星從東說闕
 丘兩箇南河東丘下一狼光蒙茸左畔九箇彎
 弧弓一矢擬射頑狼曾有一箇老人南極中春秋

出入壽無窮

鬼宿步天歌

鬼 四星册方似木櫃中央白者積尸氣鬼上
四星是燿星天狗七星鬼下是外廚六間柳下
次天社六箇弧東倚社東一星是天記

星野考辨

周禮保章氏以星土辨九州所封之域其後星
經散亡惟漢地理志載分野始詳而鄭康成十
二次之分大率因之晉天文志云班固取三統

雲南通志

卷之二

星野

五

曆以十二次配十二野及費直周易分野蔡邕
月令章句後魏太史令陳卓定羣國所入宿度
固已詳言之矣而舊志載滇分野雜引星經卒
無定論其曰太白金主益州蓋太白秦分神主華
岳華山屬少陰萬物由此而化生故金星位焉
又少昊爲白帝治西岳上應井鬼之精下鎮秦
之分野故天官書曰秦之疆也候在太白太白
主秦晉巴蜀羗髮諸國梁雍以西之地皆屬焉
是太白金主益州之說蓋通秦蜀而言非專爲滇

言之也又曰北斗第二星主益州星經以五亥
夜候北斗第二星乙亥爲漢中丁亥爲永昌己
亥爲巴郡牂牁辛亥爲廣陵癸亥爲犍爲觀象
玩占曰北斗一星主秦二星主楚三星主梁四
星主吳五星主趙六星主燕七星主齊則北斗
第二星非專主益州分野明矣司馬遷曰觜觶
參益州東井輿鬼雍州班固則曰秦地東井輿
鬼之分其界盡於西南牂牁越嶲益州固去遷
未遠若以史遷之言爲然班固以同代史官不

當更而定之矣又考四川成都井鬼分野入參
一度順慶參井松潘疊溪觜參東川屬參是觜
參固與滇無與矣而志滇者猶曰半屬觜參半
屬井鬼又以迤東爲觜參迤西爲井鬼聚訟紛
紛究同捫籥是皆徒襲乎星經之說而未攷乎
分野之實也夫分野之定起於井鬼唐一行以
山河兩戒論星野謂南河北河分夾東井爲天
之闕門主關梁所以界天之南北也故北河曰
北戒爲北戎衡星南河曰南戒爲南戎權星兩

戒之間七曜之中道出焉春分昏中兩河當於
午位就此時之中星觀之井在赤道之北黃道
經其內恰值嵩高之上以是知天之高者惟北
辰而井與北極最近地之高者惟崑崙而秦蜀
滇與崑崙爲近故定分野者必以此爲準矣又
天漢經井自井而向西北參觜次之畢昴次之
婁胃奎壁室又次之此由西北而漸下之大畧
也自井而向東南南河次之輿鬼弧矢次之柳
星張翼軫又次之此由東南而漸下之大畧也

故天官家以黃河內外水之歸東海者爲北河
以長江內外水之歸南海者爲南河因水勢南
北分合爲星野南北所主此又自天漢而斷之
也夫南河北河兩星列於井之南北於此求之
秦在西北則黃道所經之井卽秦分野蜀在秦
西南則近參之井卽蜀分野滇又在蜀之南則
近鬼之井卽滇分野是滇在井鬼之間明矣且
天狼弧矢在井鬼之南主南彝艮緬諸司之地
占南彝者必於狼則志滇分野者亦必於井鬼

此又象之彰彰可據者也雖天道渺茫非可臆測而以雲漢與地勢之高下揆之亦概可識矣世有甘石當必能辨之

氣候

滇地較各省爲高日之出入皆在卯酉比京師每遲一刻按曆可知其氣候溫和四時無大寒暑迤東則雲澂相近曲靖微寒臨安微熱元江廣南則大熱仲冬始溫迤西則永順蒙楚姚武相近大鶴微寒景東微熱永寧麗江則大寒夏

雲南通志

卷之二 星野

八

猶積雪大約全滇氣候惟元江極熱而麗江極寒故元江三月插秧六月登穀而麗江無穀麥二郡之迥異如此其他諸郡大致不甚相遠雖盛暑極熱而雨卽涼霜雪嚴寒而霽卽溫故滇中有四時皆春一雨成冬之謠又明修撰楊慎詩云天氣渾如三月裏花枝不斷四時春亦可以驗氣候之溫和矣

雲南府

地瀕大川平原廣衍冬不祁寒夏無溽暑四時

之氣和平如一雖雨雪凝寒然晴明旋復暄燠
所屬郡縣約畧皆同

曲靖府

厥土曠平微寒少熱春夏風高秋冬霜密華蘼
長妍穀宜晚稻

臨安府

四序恆溫夏不葛冬不裘惟河底沿江自春徂
秋氣皆炎熱竟年皆有瘴癘人不可入與郡屬
大異

雲南通志

卷之二 氣候

九

澂江府

川平土厚氣序溫和與省會無殊

武定府

郡治氣候頗類會城惟元謀極熱多陰霧有瘴
癘

廣西府

土氣和平多風少雪故四時花木可觀禾麥堪
穫

元江府

谷深林密恆雨少雪沿江而下晝夜炎熱如蒸
仲冬稍如春氣毒瘴中人易瘧離城高處卽覺
微涼一郡之中氣候頓別

廣南府

地近交廣暑雨恆多嵐氣蒸人眠食皆頓三時
瘴癘仲冬始溫

開化府

地接交趾春夏多炎隆冬無雪較元江則差平
和

雲南通志

卷之二 氣候

十

大理府

山高積雪水近地潮日落寒生雲興雨至然梅
開臘盡桃放春初氣亦和平惟風砭肌骨捲屋
揚沙較別郡爲異

永昌府

地近極西山高土曠多溫少寒黍稻繁殖至於
風高雨涼與他郡無異

楚雄府

春夏恆暘秋多連雨土風和厚四氣同功耕獲

最宜穀麥

姚安府

四氣平和寒暄不極雨深秋後花發春前頗與
楚雄相類然土氣瘠薄六穀之餘不滋他產

鶴慶

地近麗江風氣高寒山多積雪盛夏無暑風土
稍薄物產無多

順寧府

山高地僻沿江則熱川原則平氣候與蒙化相

雲南通志

卷之二

氣候

十一

近雲州則多嵐瘴

蒙化府

川平山環故春無烈風冬鮮積雪水溫土厚花
木時時可種獨泉源不廣灌溉維艱穀惟蕎麥

易植

永寧府

壤接吐蕃氣近朔漠高山積雪盛夏始溫麗永
毗連氣候畧似

景東府

地僻林深少寒多熱艸樹不凋霜雪希有

麗江府

地近吐蕃少熱多寒夏猶積雪秋多凄清不產
稻麥頗有邊塞之氣

鎮沅府

土近元江故春夏多熱秋冬不寒山嵐瘴癘亦
時有之

地接鎮沅少寒多暑穀麥易生夏秋有瘴

雲南通志

卷之二

氣候

三

